

Xujun xi kits'inntu Juda

B'i ts'in kikjaniñaha Juda xuta ninku

¹An Juda, an xi nda musu sihin Jesucristo ko nda nts'é tíxihin Santiago, títs'inkjínúu xujúin jun xi kichj'ajinnúu. Ntia Na'miná tjoho jun ko tikunnúu Jesucristo.

²Katuma nímaha Ntíaná jun ko 'yún katsjánúu kjuajyu ko kjuatjo.

B'i ts'in tsakúya Juda ni xi ts'in já maestru tsank'á xi tjínjihin xuta ninku

³Já nts'e, ja nd'ai mje nkjúhunna nga k'uet'ánúu xi nkú ts'in nkuhú ts'ankiá. Nd'ai tjihin nga tít'entúnúu ko títbankinúu nga n'e chúkjuo nga tinchajun xi nkú ts'in s'ejinná, kui xi nkuhú nga kin'ekjas'ehen ra xuta xi kikj'áts'e Ntíaná. ⁴B'a tíxian at'aha k'ua já xi jas'enjin mañanúu. Kui xi ja nd'ai tjíñanehe ra ni xi kanéhe at'aha najmi nda kits'in. Najmi benkjún Ntíaná jóo ko títincha ts'ínkj'óntjaiya kjuandaha Ntíaná. B'a títincha tsu nga nk'ie nga kjuandaha Ntíaná tintsúbajían ma n'eé tu mí nihí ni. Ko najmi ts'ínkjáihin Jesucristo xi Nda Ntíaná maha ko xi batéxumaná.

⁵Ndaha tsa ja kisakúyanúu ni xi xinnúu, tunga mjehéna ts'ínkj'áítsjennúu. Ntíaná ts'asjejin xuta xi ts'e nga kik'onsje ante Egipto ko askahan kits'ínkj'esun xi najmi kis'ejihin. ⁶Ko ntítsje xi najmi kixi kits'íntjusun xá xi kik'aihi nga tu y'éntu masehén antehe, kui xi kjintuyá'yún sín má jyuun santa nkúhu nga n'ekokuá nk'ie nga kuichú nistjin chánka nga cháshe mí nihi xi kits'in nga nkúnkú xuta.

⁷B'a ta incha kits'in xuta xi kis'e nanki Sodoma ko nanki Gomorra ko nanki xi tjíndaihi, xi nkú nga incha kits'in ntítsjee. Incha kits'ínkas'ehen yjoho nga chuba kikjantukohó xinkjín. Najmi kikienkjún yjoho nga 'yún tse ni xi incha kits'in. Kui nga kin'e nibájenehen ra nd'i xi najmi maha 'meyaha. B'a ts'in kik'aihi ra kju'un. Kui niu xi bakúyaná nkú maná nk'ie nga najmi nu'yá'éhéén Ntíaná.

⁸Ko b'a ta kamaha já xi jas'ejín mañanúu. Ngat'aha nchinihi títs'in chuntíhi yjoho nginkun Ntíaná, najmi benkjún xi tjihin xá ko ch'on ts'in nchjayane xi i nk'a ján. ⁹Najmi ma b'a n'e, ta santaha ntítsje k'aku Miguel najmi b'a kits'in. Nk'ie nga títjánko ndanindoo

nga tíkjányaha yjonintehe Moise, najmi kama k'un tsa ta kuihi kits'ihin kjuá yjoho. Tu sa ní b'i kitsú: “iNtíaná kats'innijéhi ni xi tín'ei!” ¹⁰Tunga máha já xi jas'ejin mañanuu, chubá ch'ohón ts'in nchjayane ni xi najmi mankjihin. Kó máha ni xi mankjin suba kuihi, xi chubá ts'ínkjáihín rá xi nkú joyaha chu nga najmi ts'innkjink'un, kui ngat'ahá ni xu'bi tít'sínkatsúhun yjoho.

¹¹iNíma rú ts'ihín jóo! Ngakjá tjíma xi nkú ts'ín ngakjá kikjatsú'ba Cain. At'ahá 'yún mjehe toon, kui nga tít'sínndyajahín rá yjoho xi nkúhu ndá profeta Balaam. Kó at'ahá incha fi kontrahá xi tjíhín xá, kui nga kuáyáha xi nkúhu Kore.

¹²Nk'ie nga ajihín kjuatjoho Nda Ntíaná ma ñjakúko xinkiu, ta bichú jóo yo, tunga najmi kjuhén rá niyá nga k'úéntujinnuu jóo. Chubá kjinehé kó 'bi nga najmi chumi nihi xi nusihín. Xi nkú joyaha nintí xi najmi tjíhín ts'í jóo, xi tu má xi tjuhén ni fikoho ntjo. Kó xi nkú joyaha yá tu xi najmi bjahá tu nga nistjihín, xi nkúhu yá xi kjamahá kjin kichjuyanji, yá xi tu xí jahá k'ien. ¹³Xi nkú ts'ín baténdzjo xúhu t'éhen ntáchak'uun nga 'yún, b'a ts'ín bakúchji jóo ni ch'onk'un xi ts'ín, ni xi tjíhín nga kama subahá kai. Kui xi nkú joyaha niñu xi kindyajahín niyáha. Kui xi tjen síhín má jyuun.

¹⁴Kits'ínkjó Ntíaná jóo nk'ie nga kits'ínkinchja Enoc. Enoc kui xi kama ntje xi ma yatuhu rá Adan. B'i kitsú: “An kíkíe nga j'aiko Ntíaná nkjin nkjún mií ntítsehe, ¹⁵tu xi kuasehe rá mí ni xi nda kits'ín kó mí ni xi najmi nda kits'ín ngayjee xutá kó tu xi xi najmi benkjúhun Ntíaná k'uéñanehe rá mí nihi xi tjuhén. B'a n'ehe tu ngat'ahá ngayjee ni ch'onk'un xi incha kits'ín kó tu ngat'ahá ni ngayjee én ch'on tsu xi incha kitsúhu Ntíaná.”

¹⁶Najmi tjín ni xi sasíhín já xu'bi. Tu mí nihí ni xi b'a ts'ínko. Nkuhú ni xi nchjahá animahá, kui xi bangisjai. Nk'a b'asje yjoho nga nchja, kó tu xi sakúhu rá ni xi incha mjehe, nda nchjayane k'ua xutá.

B'i ts'ín kitsjáníyáha Juda xutá nínku

¹⁷Tunga jun já nts'eng, n'ekj'áitsjon én xi kitsúya títjun já postruhu Nda Ntíaná Jesucristo. ¹⁸B'a kitsúnuu: “Nístjin xi fekuu s'e xutá xi kuajnukie ni xi ts'e Ntíaná kó k'úéntujín ni ch'onk'un xi incha fásihín.” ¹⁹Kui xutáha xi bakjánya xutá nínku, xi ts'ín ni ch'onk'un xi nchjahá animahá. Najmi tjíñajihín Espirituhu Ntíaná.

²⁰Tunga máha jun, já nts'eng, ndjá tinchajiun xi nkú ts'ín s'ejinnuu, kui xi tu xí naxuhú nginkun Ntíaná. Kó xi nkú ts'ín tsjáníyánuu Espirituhu Ntíaná, b'a ts'ín chubakoo Ntíaná.

²¹Katjindjukonuu kjuatjoho Ntíaná nga chúyohoo nístjin nga Nda Ntíaná Jesucristo ts'ínk'íéntu tík'unko sínna kjuaníma tak'uhun.

²²Katuma nimanuu xi jo jan tímahá. ²³N'esjejiun ajin nd'íu xi yo tjíntujín. Xi machjéhen nga kama nimanuu, katuma nimanuu. Tunga

chúhún ruu yjonuu nga b'a n'o, tū xi najmi ts'ínkatsúhunnuu ni ch'onk'un xi kits'in.

B'i ts'in kits'intsjoho Juda Ntíaná

²⁴Ntíaná tjihin nga'yún nga kúnnuu tū xi najmi kuankín t'axíhin ruu ni xi ts'e, kō ts'ín nga najmi chumi nihi xi chjuntí s'enú kō tsjánú kjuatsjo chánka tū xi kuinchahanu nginkun nistjin nk'ie nga kuakúchji kjuachánkah. ²⁵Nku tutuhú kui xi Ntíaná xi ts'ínk'ankiná. Kui xi kan'etsjoho, kayahā nga chánka kō nga kui xi batéxuma, kō nga kui xi tjihin nga'yún, tū ngat'ahā Nda Ntíaná Jesucristo. B'a kama kō tu nkjéhé ni nga b'a tíma. B'a katuma.